



Sur Benedetg Baselgia

05.09.1922 – 26.02.2001

Regurdientschas ed engraziament

Ord la pressa han ils parochians da Rueras e Tujetsch enderschiu dalla mort da sur Benedetg Baselgia oriunds da Lonsch (Lantsch). Suenter ina veta plein activitat e premura sco giuvnal dil Segner ha sur Benedetg rendiu ils 26-02-2001 si'olma al Scaffider, al qual el ha surviu sia veta duronta sco bien spiritual ed augsegner. Pertgei ussa ina menziun ella Tuatschina ? Il sribent da questas lingias less clamar en memoria la fritgeivla lavur duront la pastoraziun da 1976-1988 a Rueras. Duront 12 onns ha sur Benedetg regalau sias forzas cun cimpleina, cunscienziusa ed amicabla lavur en favur da ses parochians a Rueras, sco era a tutz Tujetschins. Sur Baselgia haveva in niebel caracter. El era in augsegner luvrus e pietus. Adina prompts e surveitscheivels cun ses confidai, pign e grond. Als malsauns e constristai sespruav'e da dar confiert cun fina demananza e carezia. En societat haveva el in saun humor e steva bugen en cusseida. El manteneva era bien contact cun amitgs, parents ed enconuschents. Ina gronda forza era sia mudestriad ed engrazieivladad enviers sias olmas confidadas, ses confrars, ses gidonters en baselgia, ministrants, calusters, cantadurs, organist sco era als organs dalla pleiv. Quellas premissas han segirau al tra-passau ina buna collaboraziun e reha raccolta enta Rueras e sin mintga camp da lavur en las differentas pleivs adossadas ad el. Per tut quella beinvulentscha in amicabel e ressentiu engraziament. La pagaglia gronda retscheiva sur Benedetg segir dil Tuppussent ellas sferas perpetnas.

Cuors dalla veta

Sur Benedetg Baselgia ei naschius a Lontsch (Lantsch) ils 5 da settember 1922. Leu ha el passentau sco giuven dils 4 affons dalla famiglia ina emperneivla affonza. Gia baul eis el sedecidius d'eleger la clamada spirituala, animaus entras siu aug sur Glieci Antoni.

Scolaziun:

Scola primara a Lontsch, Gimnasi a Mustér, Matura a Sviz, Studi da teologia el Seminari da spirituals a Cuera, Ordinaziun spirituala entras Monsignur uestg Christianus

Caminada ils 04-07-1948, Messa nuviala ils 11-07-1948 a Lontsch

Activitads:

Vicari a Platta/Medel	1949 - 1950
Rona	1950 - 1953
Surcasti	1953 - 1962
Schluein	1962 - 1976
Rueras	1976 - 1988
Serasontga: October	1988 - 26-02-2001

Casa Fundaziun S. Gion Zezras

(Johannesstift Zizers)

Giubileum d'aur sacerdotal 1998

Suenter 12 onns fritgeivel operar a Rueras ha sur Baselgia bandunau Rueras ord motivs da sanadad, schliata vesida e quitaus cul dies. Quei ha el fatg cun grev cor, sco era sia casarina Mierta Cadalbert. Duront sia serasontga a Zezras ha el gidau ora en differentas pleivs la dumengia. Quei fageva el cun veseivel plascher. En tut ses camps da pastoraziun ei sia devisa stada: «URA E LAVURA; DIEUS TEI GIDA LURA».

Ils davos dus onns ha sia sanadad dau da sbatter e sia vesida ei svanida, sias forzas ein spossadas. Il bien Diu ha lu liberau el da tut ses mals ils 26-02-2001.

La impressiunonta sepultura, igl edificont riug en baselgia a Lontsch celebraus da vicari general Dr. Vitus Huonder en assistenza da sur canoni Tumaisch Berther, sur decan Gieri Cadruvi, pader Felicissimo Thalparpan sco era biars confrars concelebrants e bia pievel dalunsch e maneivel ha demussau che sur Benedetg era beinversius. Cun in bi cant funeral dil Chor baselgia e bia oraziun han tuti participonts vuliu render stema ed engraziament a sur Benedetg per tut il prestau.

Preziau sur Benedetg

Vies cuors mundan ei a fin. Nus essan trests, mo savein ch'il Tutpuissent renda pasch celestiala a Siu carezau giuvnal, ch'a viviu mo per El ed il concarstgaun. Sil bi crest a Lontsch el bi santeri, gauda il bien plevon ussa il ruaus etern, spitgond sin la gloriusa levada. Sur Benedetg ruassei en paisch!

A parents, amitgs ed enconuschents sincera condollientscha

Vinzens Pally